

東
華
續
錄

中法續錄

同治八十五

臣王先謙敬編

臣張式恭恭校

夏四月戊戌命馬新貽撥銀十二萬兩備大婚織造工需○已

亥諭軍機大臣等文盛奏軍臺被賊竄擾調兵防剿並拏獲被脅人犯供悉賊情各摺片察哈爾額固德巴雅爾暨庫克額爾濟地方均有馬賊數百竄入肆行焚掠旋即向北逃竄察哈爾係完善之區豈可任賊蹂躪文盛見已咨明定安調回蒙古馬隊五百名由達爾濟管帶赴軍臺大路擇要駐紮探蹤追剿即著定安迅飭該總管即統前項馬隊折回聽候文盛調遣文盛當先行督飭八旗及軍臺兵弁加意巡防毋令匪蹤再行突竄杜嘎爾前已有旨令回本任見在如已病痊即著帶兵前往將此股賊匪盡數剿滅

以靖地方定安接文盛來咨卽能籌畫餉乾器械撥隊赴援尙屬不分畛域以後達爾濟所帶官兵需用餉項准文盛於軍需項下撙節動用察哈爾地方遼闊東與直隸張獨多三廳接壤張家口尤爲緊要之區著曾國藩飭令地方文武認真巡緝毋稍大意山西之豐甯歸化三廳亦與察哈爾相接並著定安李宗羲一體防範賊匪旣由北竄並有庫倫豐富可去搶奪之說張廷岳阿爾塔什達務當隨時偵探儻有賊蹤竄近卽行就地撲滅毋畱餘孽據拏獲被脅民人王六娃子所供是賊股係由甘肅甘州竄出沿邊北竄滋擾蒙古游牧賊數雖不甚多而行蹤飄忽亟須及早殲除免致勾結滋蔓王六娃子旣非甘心從逆卽著文盛按站解回原籍管束又據福濟等奏扎薩克阿畢爾米特旗突有大股賊匪焚掠召廟等語該旗南接歸綏著定安飭屬嚴密堵扼毋任匪徒溷

入將此由五百里各諭令知之○諭福濟榮全奏蒙旗被賊滋擾
見籌防守等語據稱扎薩克阿畢爾米特旗下突有大股賊匪焚
掠召廟欲取孳生官厰圖擾各游牧地方該處爲新疆往來通衢
臺站設有梗阻開繫非輕福濟等已由鄰境各旗調兵接應著卽
飭令迅速派撥蒙兵會合進剿務將此股及早撲滅以免蔓延並
飭令該扎薩克聯絡各旗力籌戰守不可輕率遷移致賊匪益無
顧忌本日復據文盛奏三月初間察哈爾軍臺庫克額爾地方突
有馬賊數百人竄擾據拏獲被脅民人供稱此股係屬回民由甘
州草地沿邊北竄欲往庫倫等語近來甘肅回匪因大兵進剿分
黨由草地北竄股數不一阿畢爾米特旗之匪究由何處竄來是
否亦係回民人數約有若干著福濟等查明具奏邊外地勢遼闊
匪蹤往來無定福濟等務當飭屬勤加偵探妥籌防範毋稍大意

將此由四百里各諭令知之○諭都興阿等奏拏獲滋擾朝鮮匪犯正法並飭接捕餘匪一摺匪徒楊幅汰等滋擾朝鮮地界經都興阿等派員將匪首楊幅汰拏獲正法並將已斃之劉克明等二犯戮屍見在接拏餘匪卽著都興阿清凱麟書恩錫飭令豐恩等督率兵弁務將在逃要匪按名嚴拏盡法懲治不准一名漏網此次該匪等越境滋事訊因朝鮮民人過江在先並著都興阿等將起釁根由咨會該國查明辦理嗣後兩國邊境務須會同巡緝毋令莠民滋事擾害地方古尼音布等貝已出邊卽飭令該員等相度情形趕緊籌辦毋稍遲緩將此各諭令知之○庚子諭軍機大臣等定安奏馬隊擊賊連獲勝仗情形一摺回匪被殺軍擊敗後竄入蒙古草地復與另股烏合肆行東犯經達爾濟督率馬隊迎頭截擊連戰皆捷所有此次打仗出力各員准其擇尤彙保以示

鼓勵昨據文盛奏察哈爾軍臺被賊竄擾已咨調達爾濟管帶馬隊五百名擇要駐紮探蹤進剿見在達爾濟受傷既不甚重卽著定安一面飭令趕緊調治仍遵前旨迅飭該總管帶隊折回聽候文盛調遣賊氛既距包頭甚近該將軍當檄飭在防文武嚴密堵禦達爾濟回察哈爾後應以何營填紮並著妥籌布置毋稍疏虞將此由五百里諭令知之○辛丑諭軍機大臣等張廷岳等奏請調官兵勦捕竄匪及籌畫餉需各摺片前據文盛奏軍臺被賊竄擾當經諭令張廷岳等隨時防剿茲據張廷岳等奏稱內地剿敗餘匪由扎薩克阿畢爾米特游牧竄入圖謝圖汗部落到處滋擾復在賽因諾顏部落肆行焚搶蒙古人眾聞警逃散並探另有大股匪徒圖犯庫倫亟應迅速撲滅毋令蔓延張廷岳等已飭東兩部落盟長調兵攻剿並咨烏里雅蘇台將軍轉飭賽因諾顏部落

派兵夾擊第兵力尙嫌單薄恐不足以壯聲威所有駐紮卡倫之蒙兵一千五百名著准其暫行檄調交兩部落盟長和貝等管帶前往西南一帶會合各旗官兵協力圍剿庫倫向無城郭蒙古情性柔弱戰守均難深恃非有得力援兵恐一時未能奏效定安務當酌撥兵勇前往會剿以期早日蕆事並查明匪擾處所距綏遠道路若干迅速奏聞至庫倫防守緊要張廷岳應否馳赴前敵督兵剿賊之處卽著該大臣酌度情形妥籌辦理此次調撥兩盟官兵需用軍火餉糈極爲緊要著戶部卽籌撥部庫銀十萬兩交順天府派員解赴察哈爾交文盛如數收明迅速撥銀五萬兩派員解赴庫倫一面知照張廷岳等派員迎提毋稍遲誤庫倫如有不敷再行陸續提撥察哈爾派兵剿賊需餉亦般准其於見存五萬兩內撙節撥用至此項部款未到以前卽照張廷岳等所請暫令

兩盟設法籌畫先應急需該蒙古各旗情形困苦豈可以暫墊之款作爲捐輸致滋擾累著張廷岳等於領到部款後卽行照數給還文盛於達爾濟到後卽飭前往剿洗杜嘎爾帶兵素稱得力病體計已痊愈並傳知該副都統揀派將弁迅往督剿肅清臺站前據福濟等奏扎薩克阿畢爾米特旗突有大股賊匪竄擾已派旗兵會擊見在剿辦已否得手是否卽張廷岳等所奏圖犯庫倫股匪著福濟榮全查明具奏仍遵前旨妥籌防剿並著轉飭賽因諾顏部落迅派蒙兵將該旗界內竄匪會同東二盟派出官兵合力夾擊以絕根株將此由六百里各諭令知之○壬寅 上詣 大高殿祈雨○諭內閣都興阿等代奏丁憂尙書因病請假一摺文祥著賞假兩箇月並賞給人蔭五兩安心調理○癸卯諭軍機大臣等李鶴年奏辦理刀匪完竣並請將出力員弁獎勵各摺片宜

陽刀匪張野貓等聚眾滋事見經李鶴年督率該地方文武設法進剿該匪畏罪投誠業已分別良莠將爲首各犯正法其餘脅從人眾分別遣散歸農並派兵入山搜捕卽著李鶴年飭令參將王壽會同該地方文武認真查緝務絕根株並嚴防外匪乘閒潛藏毋令再生事端以靖疆圉將此諭令知之○甲辰諭內閣刑部尙書譚廷襄持躬端謹練達老成由庶吉士改授部曹歷任監司疊膺疆寄旋以侍郎洊擢尙書並命在總理各國事務衙門行走數歷中外宣力有年均能恪盡厥職昨因患病賞假方冀調理就痊長資倚畀遽聞溘逝悼惜殊深著加恩追贈太子少保銜賞給陀羅經被派員勒卹帶領侍衛十員卽日前往奠醊照尙書例賜卹任內一切處分悉予開復應得卹典該衙門察例具奏伊子戶部候補主事譚寶琛著俟服闋後以本部員外郎補用譚寶璿著

賞給舉人俟服闋後准其一體會試其靈柩回籍時著沿途地方

官妥爲照料用示篤念耆臣至意尋予祭葬諡端恪○調鄭敦謹

爲刑部尙書以沈桂芬爲兵部尙書龐鍾璐爲左都御史彭久餘

爲吏部右侍郎

由副都御史遷

○丙午諭軍機大臣等前因文盛奏軍臺

被賊竄擾當以察哈爾東與直隸張獨多三廳接壤諭令曾國藩

飭令地方文武認真巡緝嗣據張廷岳等奏稱內地剿敗餘匪由

扎薩克阿畢爾米特遊牧竄入圖謝圖汗部落到處滋擾復在賽

因諾顏部落肆行焚搶並探另有大股圖犯庫倫等語庫倫察哈

爾一帶地勢平曠並無扼要處所可以守禦萬一匪蹤飄忽突向

南竄恐直境人心未免震動亟應嚴爲戒備曾國藩當勤加偵探

於沿邊一帶應如何不動聲色嚴密設防以備不虞之處卽著妥

籌辦理前經劉盛藻派趙宗道管帶銘軍八營移紮保定該軍是

否勤加訓練足備調遣嗣後有續調來直者否該督前奏酌議練
軍事宜古北口又添千人卽由提督傅振邦統帶此軍是否足恃
其餘譚勝達等所統正定等處練軍遇有緩急能否備調以資策
應著曾國藩統籌全局豫爲布置將此諭令知之○諭李宗義奏
殺軍擊剿續來回匪獲勝一摺逆回竄擾草地被官軍擊敗後復
有後股賊匪馬玉芝率眾來援經蔣東才帶隊追剿斬殺甚多並
將馬玉芝擊斃見在榆境邊內外已無賊蹤著定安李宗義咨會
宋慶隨時偵探飭令在防各軍加意嚴防如有敗匪竄入卽行盡
力兜剿悉數殲除毋稍鬆懈庫倫至察哈爾一帶賊匪竄擾著定
安懷遵疊次諭旨迅撥兵勇會剿並查明匪自何來被擾處所距
綏城道路若干迅速奏聞包鎮至石嘴磴口以迄甯夏一帶近日
有無匪蹤竄及糧運是否疏通亦著隨時具奏將此由四百里各

諭令知之○諭總理各國事務衙門奏美國使臣蒲安臣病故見籌辦情形鈔錄志剛等奏彙各摺片美國使臣蒲安臣前經派充出使各國大臣與志剛孫家穀前往有約各國辦理中外交涉事務該使臣周歷英法美暨瑞丹和布諸國遠涉重洋不辭勞瘁辦事諸臻妥協本年正月間行抵俄國病故殊堪憫惻該使臣身後事宜業由志剛等妥爲照料兼撥銀兩經理喪事著加恩賞給一品銜並賞銀一萬兩由出使經費項下撥給交該使臣家屬祇領以示優待之意蒲安臣業經身故出使事宜甚關緊要著該衙門飭令志剛等督同左協理柏卓安右協理德善悉心商酌妥爲辦理將此諭令知之○諭廣東督撫申禁械鬪盜葬積弊○廣東東靈山封川陽山高明四縣學額各二名○丁未諭軍機大臣等金順奏中衛防軍疊次剿賊獲勝一摺炭山等處竄匪經黃金山

擊退後復有河州回逆竄至北沙窩一帶又經該總兵沿途追殺餘逆由沙坡根渡河逃竄卽著金順飭中衛地方文武實力防守不可再令匪蹤竄入並飭黃金山隨時偵探如有股匪滋擾卽行帶隊擊剿盡殄逆氛王家疇回匪乞撫後繳出馬匹器械甚少該匪心懷疑懼亟應加意防維並著金順與張曜隨時酌商相機辦理如該匪真心投誠不妨予以自新儻以官軍圍剿甚急故作緩兵之計卽當乘機進剿不可墮其奸謀甯夏至磴口石嘴一帶近日有無賊蹤竄及糧運是否疏通並著隨時具奏將此由五百里諭令知之○兩廣總督瑞麟等奏靈山等處匪徒滋事札飭知縣馮詢等帶兵會剿得旨著飭令馮詢等迅速進剿盡殲醜類並飭合浦欽州各文武一體嚴防合力剿辦以靖邊圉又奏西匪竄入西甯見經官紳擊退批蒼梧等處尙有賊匪屯聚難保不復竄東

境著卽飭令西甯等州縣督率紳團認真防剿毋令賊蹤闖入並著瑞麟嚴飭梧州所屬文武實力勦辦務絕根株毋任滋蔓○壬子子江蘇殉難從九品吳治謨訓導王與沂建祠○癸丑左宗棠奏續據總統南路諸軍周開錫稟稱上臘二十八夜逆回自狄道渭源出漳縣三岔西十里許之野狐橋乘度歲之際圖伺官軍之懈道員湯聘珍得報令軍中戒讌飲准備擊賊初一日督同提督梅開泰所部整隊進剿賊聞風遁黃香溝距漳縣已七八十里初四日黎明偵騎賊數百襲踞晉家堡湯聘珍梅開泰各營急起掩之賊駭而奔躡殺尾賊十餘名初五日總兵周文翔隊伍追賊及石灰溝口梅開泰循漳縣山脊橫出王家河邀賊歸路前後鈔擊斬殺百餘名餘逆漫山鼠竄十一日復嘯聚殘黨數百由黃峴口繞出老幼店時總兵范銘一軍經周開錫裁併之後分駐秀石關

酒店驛木寨嶺等處扼防岷州十二日黎明伺賊至望隊迎勦斃賊六十餘名生擒四名賊狂遁而西同日賊馬步千餘下渭源熟羊城俯瞰鞏郡總兵王得勝隊伍出鞏郡之左提督彭忠國隊伍出鞏郡之右兩路馬步併力壓下敗之斬馘四五十人陣擒五名追至熟羊城而還二十五日賊復糾合馬步三千餘眾沿王家河出石灰溝口劫周文翔營壘勢眾且悍湯聘珍得報令總兵葉占魁照料漳縣營壘總兵王光富率馬步前驅自督所部行隊隨後策應行近石灰溝口瞭見馬賊結十數團往來衝突步賊旗幟如林周文翔正背壘而陣與賊相持王光富怒馬衝鋒催隊橫列周文翔營前直劈賊陣截馬賊爲兩楮步賊衝出山口救援馬賊湯聘珍揮軍搶上山腰鈔賊之後賊勢潰敗官軍蹕至王家河其截斷之馬隊二百餘經周文翔分道鈔擊擒斬尤多據生賊供此股

逆目卽劉四花鄉約馬元張二四皆西和禮縣回逆叛附狄河者也上年九十月之交闌越西禮經官軍勦敗花馬兩逆負槍傷而逃此次因狄河乏食陝回希圖東竄噉由鞏昌漳縣岷州犯甘南腹地牽綴官軍嗣二十五日湯聘珍督隊擊敗之後賊遂由王家河趨甯遠屬之攤歌禮縣屬之馬塢疾奔而南記名提督涼州鎮總兵傅先宗派提督丁桂智總兵王銘忠馬隊自甯遠馳出新寺鎮截賊賊之馬步已循馬塢越鹽關竄西和蔓及成徽兩當各縣而傅先宗之追兵已落賊後周開錫比飛檄王得勝督馬步自鞏昌伏羌迤鹽關繞成徽而東會同丁桂智王銘忠馬隊斜出賊前派提督高月桂李奉清陳天佑所部出秦州之娘娘壩高橋指徽兩擣賊中堅副將徐仕海之營守鹽關扼賊歸路賊伺官軍分道並進卽由徽兩間道旁溢秦州屬之甘泉寺百花川覬覦州城官

軍連日躡賊而賊蹤颺忽靡定不得一戰周開錫誦賊所向派總兵田連考簡銳卒百二十人扼秦州東路朱家祠衝要檄追兵倍道躡其後二月二十五日騎賊數百奔朱家祠田連考揮壯士猛擊之而退是夜諸軍雲集劉家堡距朱家祠十餘里約詰朝會剿而賊未之知也二十六日黎明賊騎步二千餘眾犯田連考營壘軍士堅壁禦之相持兩時之久高月桂李奉清陳天佑副將謝復雲唐晉林賢俊自劉家堡掩至內外夾擊斃悍賊二百餘名賊勢不支向康家巖狂遁官軍躡三十餘里抵壩家川零股悍騎近千橫出西路適總兵蘇家良馬隊自秦州趨程駛至遇之奮威衝擊賊敗走康家巖合股回戈返鬪各軍乘全勝之勢一鼓壓剿直前縱橫盪決又斃賊二百餘名生擒三十餘名賊迤東而南遁白蠟峽二十七日官軍追至白蠟峽賊已循禮縣之固城鎮四溝臺奔

永平鎮三月初三日丁桂智王銘忠馬隊追及之賊分兩股一下
莫家山坡一出大峽溝口官軍馬隊亦張兩翼直前雕剿王銘忠
擣莫家山之賊賊踞山口憑險以拒軍士下馬持矛超距而進刺
斃悍賊五六十名敗賊冒死西奔其大峽口一股經丁桂智斷其
出路賊卽越嶺遁竹林坡官軍馬步分途鈔殺擒斬數十名跌斃
崖墜者不計其數輜重拋棄山谷拔出被脅難民數百名餘賊越
馬家河出甯禮交界之栗子坪奔狄河方南路各軍追賊徼兩之
時跌回崔三禹得彥李經舉邀河回米阿渾等悍黨同出狄道越
安定西南七十里之馬家河二月二十一日黎明提督楊世俊自
安定率兩旗馬隊截之斬馘多名正追殺間伏賊突起山溝四面
包裹而至楊世俊改騎爲步揮刀督陣士卒以寡敵眾殊死戰不
少卻搏戰四時之久楊世俊左脇中叉子槍傷士馬亦多損失楊

世俊襲創嚴陣而退收入安定城是日賊零股千餘竄紅土窯東北二十里之謝家河總兵敖天印率兩營步隊會合楊世俊分防紅土窯之提督張仲春參將楊德俊馬隊遇賊於紅土窯十五里之剪子岔自午至申鏖戰三時賊敗退馬家河合大股東趨連日擾及通渭之榜羅鎮秦安之龍山鎮清水之張家川臣宗棠因陝回馬阿渾一股已由陝境負創遁入甘境歸巢而甘南徽兩竄賊戰事方殷陝回河回又乘閒以踵其後必將勾結爲患窺伺汧隴寶鳳以遂其鼠竄遁逸之謀比飭周開錫嚴督甘南各軍分路堵剿檄李輝武一軍由鳳翔西指會合甘軍先清徽兩之賊分兵安籌隴防顧陝疆門戶檄吳士邁所部剋日由乾州赴汧隴而西力遏竄氛嗣周開錫因崔禹各逆趨重清水撲犯城垣飛檄湯聘珍自漳縣轉旆而東星馳援剿其時花馬等逆經官軍痛擊於秦州

朱家祠等處亟圖歸巢不能與崔禹各逆合股周開錫遂以王銘忠丁桂智馬隊躡其後抽出王得勝田連考各軍合擊清水之賊三月初三至初六日米阿渾等喊馬步賊更番圍攻清水縣城在城文武紳團固守待援勢殊岌岌初七日湯聘珍軍至城圍始解初八九等日王得勝由秦安進田連考由秦州進均先後抵清水迨各軍分途剿賊賊悉趨張家川脅屯畱張家川之陝回海成等逆挾之東行一由閻家店入陝西隴州馬鹿鎮度咸宜關入渡鎮趨汧陽縣頭鎮一由赤沙入隴邊香泉鎮出賈村原趨寶鳳分股由椒川漫坪擾鳳縣境提督李輝武調所部分駐隴州鳳縣各營截之雖少有擒斬而賊眾剽悍迅速未能遏其偷越初十日李輝武親督所部擊賊於縣頭鎮敗之十一日吳士邁由鳳翔拔隊赴汧陽汧陽賊於先日已合大股斜出寶雞賈村東趨鳳翔之陳村

吳士邁乃回軍東向剿之十三日李輝武率所部出寶雞十四日以六營分三路從黃家巖擣陳村賊巢鏖戰三時適吳士邁自汧陽馳至埽蕩蔡家山吳西莊之賊風馳電掣而來合力擣陳村賊巢賊大驚潰兩軍乘勝鈔擊擒斬賊以千數百計敗賊向柳林鋪奔岐山十五日吳士邁李輝武躡賊岐山比經臣宗棠添調之總兵殷華廷馬隊亦到十七日會師擣羅局鎮之賊李輝武殷華廷由蔡家坡進西路賊之大隊仍分數路鈔來李輝武殷華廷穿入賊陣軍士併力撲之西路之賊先潰吳士邁夾棗林鎮進東路直偏羅局先伏兩營於東路破堡截賊出路追各軍將巢賊擊動賊分途狂竄伏兵突起擊之截殺尤多是役官軍共斃賊千餘名生擒三十九名截賊爲兩一東竄扶風一西竄鳳翔官軍弁勇傷亡六十八名自此賊勢分而克餒頓滅東竄之回爲陝西逆首禹得

彥李經舉河州逆目米阿渾等敗殘之後人數不過三千有奇然
馬多於步已革總兵張福齊一軍以撫臣檄又敗之扶風醴泉之
間撫臣蔣志章復檄提督劉端冕之軍出鄜洛扼北山之防知府
陳鴻藻總兵王萬年同知童兆蓉各營聯絡張福齊之軍分途追
剿賊竄至渭南水師遏之遂竄蒲城以趨白水蓋欲入山覓路回
竄甘肅也張福齊各軍自高陵東趨緊躡其後二十三日及賊於
白水新窯鎮復敗之是戰註銷總兵徐萬福戰尤力身受八創斃
賊尤多敗賊掠過宜君中部兩縣界劉端冕所部提督甘大有擊
之魚鱗川斃賊亦多二十七日賊竄入甘肅甯州界所有陝境擊
賊獲勝詳細情形已由撫臣會銜陳奏矣賊前隊竄至甯州署知
州楊大年率城防勇丁截之小有斬獲二十八日竄至拜家河署
平慶涇道魏光燾擊敗之二十九日竄至鎮原縣屬孟壩寺總兵

江得意截之西壕三汊河敗之四月初一日竄至固原州屬白家
壩陝安道黃鼎自率馬步七營截之飭所部提督徐占彪分統四
營截之洪溝炭山一帶大獲全勝斃賊千數百名陝回李經舉卽
李金菊河回米阿渾卽閔阿渾及從金積堡竄出之土回單仲明
等均經陣斬其餘小頭目等擒斬無數惟陝逆禹得彥四百餘騎
仍由鹽茶廳一帶竄走其西竄之崔三一股賊數約尙有二千餘
三月二十日由隴州竄張家川見復由秦安北竄至莊浪隆德之
間臣已調徐文秀黃鼎剿之所有甘境獲勝詳細情形容卽察實
專摺馳陳又奏據劉錦棠黃萬友稟馬化澂被剿窮蹙惟圖決渠
洩水以困官軍嗣官軍傍壘築長隄闊三丈高丈餘北抵黃渠南
接金積里許復開濬深溝以資堵洩而秦渠馬連渠之水連日被
該逆決放者均隨時引注永甯洞口合流入黃賊不得逞復憑東

南山水溝設卡築壩圖淹吳忠堡赴河西運道分股犯官軍河東營壘二月二十日黎明金積附近堡寨角聲四起陝甘各回馬步紛紛沿漢伯堡波浪渠隄出胡家堡而東其時黃萬友尙督隊赴靈州護糧也提督潘運璋王秀棣等會合金運昌派駐之兵憑牆壘禦賊河岸轟斃多名迫劉錦棠金運昌飛調前敵大隊馳擊賊已向胡家堡遁去是晚各軍行隊均宿吳忠老營適黃萬友所部亦至劉錦棠比商之金運昌傳令軍士準備剿賊二十一日五鼓整隊向胡家堡進天甫明瞭見山水溝賊修成三壘近壘之處野潦縱橫馬步賊萬餘隔水排列壘前劉錦棠金運昌揮隊斃水聲之金運昌進左路劉錦棠進右路黃萬友督提督周國勝王秀棣李雲貴何作霖王承贊尹興茂軍功李雙良分兩大支一鼓直前劉錦棠督中軍爲策應各路馬步正逼近賊壘步賊分股入壘踞

守大股隨馬賊衝突而來勢甚兇悍各營槍礮環轟子如雨注馬賊稍卻軍士併力壓下馬賊敗退步賊之後步賊挺矛對刺冒死交鋒馬賊亦回頭分鈔左右鏖戰逾時官軍奮威衝殺當者辟易騎賊紛紛墜馬步賊傷亡亦眾相率潰散官軍乘勢躡至壘邊守壘之賊憑堞放槍敗賊亦倚牆抗拒壯士不避鋒鏑愈戰愈奮劉錦棠復飛令提督譚拔萃易致中羅照昇更番助戰壘外敗賊自量不敵狂遁胡家堡漢伯堡而西黃萬友從各壘中空之地追出見壘門未閉守賊仍植立不動卽令何作霖督隊防敗賊回援調洋槍洋礮手分堵左右三壘出路劉錦棠金運昌督各營合圍之壘賊見官軍四面環攻銳不可當登時慌亂壯士有奪門而入者有猱騰而上者立將三壘一鼓攻克悍賊一千二百餘名無一脫者各營平其壘而還兩日之戰除破壘擒斬之數陣斃逆眾尤多

陣亡弁勇二十一名受傷者四十九名二十二日黎明劉錦棠調馬步賊二千餘赴山水溝廢壘收屍飛商金運昌出隊行四里許馬賊四五百名竟出山水溝挑戰劉錦棠以六營結方陣猛打猛進躡近溝邊騎賊返撲陣前步賊踰溝踵至零股步賊仍伏溝中相持至午刻各營已進距王秀棣營前金運昌亦率隊自北路鈔出劉錦棠飛令各營前後夾擊馬賊奪路遁去步賊落後兩軍縱橫盪決斃賊五六百名生擒七十四名餘賊向山水溝敗歸胡家堡其徘徊溝中逆黨亦望風先潰劉錦棠所部陣亡弁勇十一名受傷二十九名據擒逆目周斌之子長順供馬化澁因官軍緊逼金積堡附近之秦壩關早元堡板橋漢伯堡不能耕種堡中存糧無多有岌岌難支之勢故日嗾陝甘各回築壩洩水以圖退兵不料屢爲官軍所敗二十一日山水溝修壘步賊係甘回馬九王洪

袁老九等馬賊係陝回臨洮謝四各股王洪之姪王天福已經官軍擊斃壘中矣訊畢正法軍前嗣是陝甘各回連日負創之後伏巢不出二十九日五鼓馬九王洪復喊余禿子楊三辣西甯逆回張阿渾及陝回余彥祿黨眾出胡家堡之東廩聚靈州西南五里之王銀柵排立賊壘兩座分股入踞其中大隊蔓延各破堡蓋欺靈州兵單意在覬覦州城圖劫前敵各軍東路還道也是日午刻劉錦棠得報整隊卽起出吳忠堡繞河岸而東二鼓潛入靈州城傳餐小憩三十日五鼓合分防靈城兩營成列以出行近賊巢守賊尙未覺黃萬友率李榮貴何作霖曾松明各營分左右路襲各破堡踞賊劉錦棠率提督譚拔萃周國勝易致中知州李樹棠各營直指王銀柵賊壘各路號鼓齊鳴火器並發各破堡之賊自夢中驚起不及齊隊爭向新堡狂奔壘賊吹角站牆開壁迎戰劉錦

棠黃萬友揮軍併力壓之三路猛撲壘前壘內外賊登時潰敗四
路奔逃官軍乘勢鈔殺有逃走不速隱匿廢堡之賊接斬無遺兩
壘一律平毀各振旅而還是役斃馬步賊一千數百名生擒八十
餘名官軍勇丁陣亡二名受傷者三十一名數大捷之後士氣益
壯賊膽益寒馬化澹計無所施又率其子馬耀邦具稟到劉錦棠
軍前乞撫以春耕緊要爲詞求大兵退吳忠堡劉錦棠許其耕墾
不許退兵仍勒限悉繳馬械據擒賊供近來馬化澹已挨戶派糧
三次矣春耕失時再困數月賊糧無出必致餓乏不堪臣見飭劉
錦棠相機圖之又奏金積堡陝回自定邊環慶兩路竄陝各股仍
循慶陽鎮原豫望一帶北遁逆目馬呼來一股經道員魏光燾總
兵江得意等擊敗歸巢無幾臣已於三月初七日陳奏陝回馬阿
渾等眾蔓及武功扶風一帶所有在陝各軍戰狀已由前署撫臣

劉典馳報二月二十二日賊敗由永壽竄入甘肅靈臺屬之邵寨崔木等鎮吳士邁所部追及之賊已分股狂遁二十三日折竄長武道員朱明亮督隊自涇州截出敗之是日賊越甯州焦村奔蕭金鎮零股繞出涇州荔家堡西趨魏光燾得報分兵守慶陽挑馬步兩營行隊數百人疾趨甯州檄分防驛馬關黑河各營會剿二十四日午刻魏光燾及賊於焦村十五里地方揮隊擊之截賊爲兩樞一支折回焦村提督戴佑勝等扼剿於後一支趨蕭金鎮魏光燾督參將袁海壽譚吉士等壓剿而前賊欺追軍單薄悉銳以抗戴佑勝之兵魏光燾譚吉士應之賊勢稍卻而零股絡繹西奔者忽縱擁而至焦村包裹而前魏光燾返旗回撲步隊夾馬隊而陣外環刀矛閒以槍礮輪轟之鏖戰一晝夜軍士勺水不入口屹立如山勇氣百倍相持至二十五日黎明賊之精悍傷夷已多陣

勢漸亂壯士乘機衝突賊大潰向蕭金鎮鼠竄而去官軍蹕至三
不通傳餐休息方魏光燾進兵焦村之時總兵熊道濱率隊出驛
馬關副將蕭玉元率隊出黑河川兩路行抵西峯鎮賊之前股已
由蕭金鎮沿打家河而上二十三日知縣羅壽昌偵賊來路督畱
守黑河焦家河前左兩哨截賊於打家河賊以悍騎翼蔽在前喉
羸弱者狂奔而西羅壽昌正揮戈督戰熊道濱蕭玉元追勦之兵
亦至前後夾擊斃賊百餘名賊眾擁擠河岸自相蹈藉拋棄騾馬
糧食向太平鎮逸去迨提督劉端冕派隊隨魏光燾由三不通踵
至已追之不及矣是日鎮原防軍江得意經臣調赴西壕遇賊於
棗林截之賊飛奔孟壩寺二十六日江得意率步隊會合副藍旗
馬隊分兩路躡賊沿途擒斬頗多賊且戰且走向三汭河竄豫望
一路薄暮魏光燾之兵先後齊集偵賊去已遠遂駐營張家坵二

十七日收隊回防其後股賊騎百餘由涇河川敗竄者劉端冕派提督甘大有尾追之二十六日過黑河川羅壽昌督隊迎頭攔截奪其戰馬賊黨全數擊散賊之北竄豫望也正提督徐占彪總兵蘇如松截剿馬正和敗殘陝回獲勝自韋州收隊回防之時二十九日未刻詞賊騎自豫望東南三十里毛渠井狂奔而西徐占彪蘇如松會商該逆奔馳疲乏應乘黑夜襲之戒軍士成列以出派士民爲嚮導一出毛家墩鈔賊之前一繞蔡廟斷賊之後一橫出馬家大山溝底擣賊中堅漏初下徐占彪舉礮爲號親率正營自馬家大山溝底竄出壯士大呼陷陣殺聲震谷左衝右突當者披靡賊正倉皇挺走蘇如松忽率精善營馬隊從後面兜剿而來該逆全數奔毛家墩總兵陳春萬伏兵突起攔頭截之各路馬步亦愈戰愈勇該逆敗遁下馬關一路三十日黎明官軍躡至下馬關

祇見零星殘賊或三五人或六七八人踰溝越嶺而遁不復成股沿途斬殺數十名振旅而還訊據擒賊供馬阿渾卽馬朝元自正月初一日糾陝回十三營股眾不下二千名由金積堡銀條梁竄入北山到甘泉與馬正剛合人數漸增東犯韓邨走高陵涇陽醴泉乾州扶風永壽一帶出靈臺崔木折竄董志原歸巢馬正剛之子則經官軍擊斃道左鋪矣臣維馬阿渾等眾經陝西各路官軍次第剿敗回竄甘境者賊騎不過千數百名魏光燾以數百人扼之焦村大挫兇鋒其敗歸也一創於打家河黑河棗林諸戰再創於徐占彪蘇如松毛渠井諸戰前後擒斬實數以六七百計所贖殘黨狼狽歸巢者糧畜器械均爲官軍所奪逆首雖未伏誅而賊膽已寒矣又奏固原墮茶廳土回種落蕃衍良莠屢雜上年官軍北進剿撫兼施均經臣隨時陳奏而東西兩山土著回匪仍假息山

谷糾黨劫掠糧運多梗其金積藏匿各回因飢四出掠食並嘯聚土回分起滋擾臣比飭平涼固原慶陽諸軍嚴密搜捕二月初西山李野賊李存昇李兒步讀馬百長楊茂林五六眾繼至馬騾掌楊家溝羅家腰嶮等處初七日提督周紹濂飭總兵張大雄副將周玉林自李旺堡進剿令回目馬益順爲嚮導黎明抵楊家溝賊見官軍卽紛紛潰散乘勢攻馬騾掌及羅家腰嶮之賊張大雄周玉林令各哨夾滿家山疾走斃賊數十名初九日賊復聚楊家莊初十日四鼓張大雄督五成隊襲之賊越山狂遁同時匪目明先行卽明七十子股眾盤踞劉家臺子距白家壩五十餘里道員黃鼎派提督徐占彪領馬步四營由固原拔進初九日襲賊於劉家臺斬悍賊百四五十名生擒二十餘名初十日徐占彪調穆仲元明先行等逆距劉家臺東北狼兒溝元城子黃鼠鑽爲巢飭總兵

陳春萬趙興隆副將劉心灼分馬步三路擣之共殺百數十名
餘匪散而復聚於教場川十二日官軍掩至賊已聞風宵遁僅斬
落後尾賊數名其時李野賊之黨楊滿林馬宗祥股眾二百數十
人乘間竊發於西山鷹踞圓圪塔紅麻川夏回軍功王益萬自王
家團莊飛報提督丁賢發比派副將吳啟雲守備張玉梁整隊馳
剿二十八日辰刻王益萬引官軍圍圓圪塔山下賊館賊冒死衝
突官軍陣斬二十餘名生擒楊滿志馬環環子李七餘子馬割膽
子等十一名三月初一日天甫曙分駐固原楊家老莊之參將于
維槐詞步賊百餘圍攻鐵家溝民堡率隊救之適夏回穆進善率
旌善營馬隊從碾子頭壓追而南于維槐復截其去路陣斬逆回
四五十名生擒匪目馬宗祥訊供李野賊自豫望城喉之前來途
遇陝回數十人夥出西山掠食經官軍擒斬殆盡矣是日東山匪

目刻仲祿復援及固原三關口一帶申刻副將盛照魁率所部行隊自蒿店護糧過三關口遇賊步騎五六百名劫去糧馱哨弁楊雪亮躍馬砍陣力戰而亡盛照魁調知率隊進剿斃賊二十餘名奪回騾馬數十頭初四日提督陳廣發自瓦亭率良營八成隊護糧行抵海口子地方偵知明七十子之黨騎賊數十步賊二百餘絡繹出巢陳廣發伏山溝左右以待賊至伏發斃賊百二十餘人餘賊奔固原適黃鼎所部副將黃虎臣護糧適至揮馬隊迎頭截之斃賊三十餘名生擒四名初九日副將總兵趙興隆副將何玉超護餉至高崖子參將林定遠守備黃錦團並騎先驅偵探賊蹤遇賊零騎被害趙興隆何玉超等十三日由黑子山溝進剿斃賊十餘名賊目海滿寬仍據險抗拒擲石擊傷官軍官軍冒險急攻夏同楊如雨將逆目海滿寬縛獻軍前正法降其餘眾十四日抵

老陽莊賊目丁保中乞撫受之旋據探報賊目單貴馬生江等竄至李家店何玉超令楊如雨卽夜掩擊斃賊七八十名窮追至虎狼口誦餘賊已合明先行剡仲祿一股踞狼兒溝蒲家墩一帶十五夜趙興隆何玉超潛師襲之四鼓分路鈔截立將狼兒溝蒲家墩賊巢攻破斃賊三百餘名旋據楊如雨報逆首剡仲祿受傷藏匿狼窩溝爲官軍亂刀砍斃獲其屍呈驗其明七十子單貴兩賊則隻身逃竄荒谷黃鼎已飭楊如雨捕之餘賊投誠免死安插其竄入瓊慶一路者賊目爲李化魁蘇進萬李良友張義全均由金積堡竄出或百餘人爲一起或數十人爲一起意圖騷越陝境經魏光燾派隊截勦陣斬蘇進萬李良友張義全生擒多名餘賊得脫者實亦無幾臣維東西兩山廣袤數百里山谷盤亘漢民少而同民多其間良愿守分回民雖復不少而種族旣繁氣類亦別良

同每爲匪回所劫持難於自拔馬化澹故得以其新教煽惑而勾結之自官軍分駐中路勦撫兼施又錄用諸良回爲之嚮導誅其莠而宥其良腹地伏莽乃漸有肅清之望雖陝甘逆回或由金積堡南來或由陝境北竄而諸營聯絡布置地網四張良回復爲偵探導引每得掩其不備而殲之其各軍截勦陝回禹得彥河州回米阿渾等逆獲勝情形另疏據實馳陳 上諭軍機大臣等甘南徽兩等處竄回經湯聘珍各軍先後擊敗而賊之前隊竄至甯州又經魏光燾等追擊擒斬甚多陝回禹得彥仍由鹽茶廳一帶竄走其西竄之崔三一股由隴州竄張家川後復由秦安北竄至莊浪隆德之閒左宗棠已調徐文秀等率隊追勦惟見在各路回股每於陝甘交界處所東奔西竄牽掣官軍而甘之河狄尤爲逆眾逋逃之藪左宗棠穆圖善務當飭甘陝各軍分投勦洗迅將禹

得彥崔三各逆設法殲除以孤賊勢金積堡踞回疊經官軍痛剿
勢甚窮蹙二月二十日後劉錦棠等軍又將山水溝賊壘三座暨
王銀柵賊壘攻破馬化澂復詭詞乞撫該逆詭譎異常見當圍困
糧盡正可乘機計取著左宗棠檄飭劉錦棠等斟酌情形妥籌剿
辦毋爲該逆所給馬阿渾等股因爲陝軍剿敗回竄甘境魏光燾
於打家河毛渠井等處痛加剿擊所贖逆黨無多仍著左宗棠分
飭魏光燾等跟蹤追剿迅速殄除毋任該逆苟延殘喘因原鹽茶
及環慶各處客土回匪節經周紹濂等剿擊實足大挫兇鋒惟該
處山谷盤亘回民種類亦繁左宗棠務飭在事文武時加搜緝剿
撫兼施毋任匪徒乘機煽惑以消隱患將此由六百里各諭令知
之○于甘肅陣亡參將陳思忠祭葬世職○甲寅諭軍機大臣等
左宗棠蔣志章奏剿敗竄陝回股腹地仍復安謐並榆林安邊等

處勦賊情形各摺片崔禹逆股竄擾陝境經各軍分投追勦連戰皆捷見在崔逆西奔禹逆東竄敗殘之賊所餘無幾鳳西同乾鄜境內已無賊蹤惟崔禹兩逆帶傷逸去並未就擒其夥黨各圖潰散之說亦不足憑且劉典曾報陝境腹地肅清乃未幾而崔禹等逆旋即竄入幾致蔓延所謂肅清者安在該督撫等務當嚴密布置檄飭各將領認真防勦並將該逆首設法殄除毋任匪蹤再行闖入此次該督等奏保出力各員朝廷姑如所請藉以鼓勵軍心嗣後敘功獎勞務求允當毋得率行奏請以昭覈實安邊堡同股已退回金積老巢仍著蔣志章飭令劉厚基等督率各營隨時防範以期周密並著左宗棠妥籌兼顧將此由五百里各諭令知之○予陝西陣亡參將黃萬陞祭葬世職○乙卯諭軍機大臣等都興阿等奏飭拏過江餘匪辦理情形一摺邊外滋擾朝鮮匪犯見

經都興阿等續獲薛萬祿一名正法訪聞逸匪劉克功潛逃邊裏
據奕艾等查明從前擊斃夥匪內有著名匪首李成蹊等三名並
將土隄塔等處賊匪窩棚全行焚燒朝鮮國亦即將該處江岸游
民窩棚平毀該將軍等見仍派員接緝餘匪著都興阿清凱麟書
恩錫飭令訥欽等將劉克功躡拏務獲並令春鐸帶兵隨時投捕
餘匪務絕根株至善後一切事宜應如何與朝鮮國會辦以杜後
患之處並著都興阿等斟酌情形妥籌辦理小黃溝卡官錦州佐
領依克錦金州防禦富伸泰前於匪民在該管地方滋事毫無覺
察均著交部議處將此各諭令知之○丁巳諭內閣崇實吳棠奏
援滇川軍克復魯甸廳城生擒要逆遵將出力員弁開單請獎一
摺雲南逆匪李本忠竄踞魯甸廳城提督唐友耕督率官軍分路
進攻疊破賊巢當將廳城克復生擒逆首李本忠及賊黨多名正

法昭魯漸次肅清在事出力各員洵屬著有微勞自應量予獎勵
唐友耕越境援剿疊著戰功此次迅克堅城擒斬要逆實屬異常
出力唐友耕著賞穿黃馬褂以示優獎另片奏請將隨同克復城
池之知府英文等失守處分免其置議等語昭通府知府英文署
魯甸通判吳廣通帶練隨剿雖有微勞足錄惟未能先事豫防究
有應得之咎未便遽予免議英文吳廣通均著革職畱任以觀後
效○諭軍機大臣等曾璧光奏黔省軍務緊迫糧餉兩空見在籌
辦情形一摺黔省苗教各匪雖經川楚黔各軍分路防剿而賊眾
兵單總未大張撻伐曾璧光見令總兵李榮春毛際惠等分由安
順水城募練前進剿洗土匪卽赴興普合攻回巢其大定屬之積
匪濫竽遵義屬之漏網餘匪卽飭馬宗駁蹇閻等會同府縣各官
認真按剿並力保開修等縣以顧餉道派兵駐紮定廣以遏賊氛

所籌均尙周密卽著該撫督飭在事員弁實力防剿毋稍玩誤獨
山荔波等州縣界連粵西自都勻失後定廣賊熾省軍鞭長莫及
援助爲難曾璧光請飭廣西各軍由獨荔一帶掃蕩而前亦是正
辦惟馮子材督兵剿辦越南匪徒尙未蕙事能否分兵援黔之處
著蘇鳳文馮子材酌度情形妥籌辦理遵義教案疊經寄諭曾璧
光迅速辦結乃該撫並不妥爲籌辦輒將李鴻章派出之道員余
思樞派赴貴定辦理軍務殊屬延玩見在法國在京公使日以黔
省教案未結向總理各國事務衙門催問著曾璧光迅飭余思樞
剋日馳赴遵義會同黔省人員將教民一案辦結不得再涉遷延
其貴定羊場等處卽著責成提督劉士奇統籌防剿不准藉詞託
病貽誤戎機崇實吳棠劉峴當督飭川楚各軍將黔省苗匪痛加
剿辦毋稍懈弛貴州地瘠民貧用兵日久糧餉兩空困苦情形實

深塵繫著崇實吳棠劉岷按照戶部奏定協黔餉數按月源源解濟以拯飢軍並著戶部查明應解黔餉省分飛速咨催一面另籌有著之款奏明動撥解赴黔省俾士馬飽騰早收廓清之效曾璧光請將黔省各局收捐正印五項指省分發展限著准其再展一年仍照部議編號彙咨以免混淆而昭慎重將此由六百里各諭令知之○已未諭內閣恩麟等代奏達賴喇嘛呈請前往布賚綏兩寺講經熬茶請旨一摺達賴喇嘛遵照向例前往舊建寺院布施熬茶並化導所屬具見誠惻朕心深爲嘉悅達賴喇嘛本年選定吉期前赴布賚綏兩寺講經時著恩麟等隨時妥爲照料○壬戌上詣大高殿祈雨○諭軍機大臣等定安奏派兵援勦竄匪並籌辦水陸轉運糧石請派署副都統各摺片軍臺竄匪滋擾見經定安派達爾濟帶兵助剿並調防河西纏金等處卽著文盛

飭令達爾濟會同察哈爾官兵務將竄匪悉數殲除毋畱餘孽並
飭富勒琿貢果爾嚴防河西纏金一帶如遇河西有警卽令劉景
芳帶領馬隊渡河迎擊並飭沿河步隊會合協剿以壯聲威近日
察哈爾軍臺是否枚靜匪蹤竄往何處著文盛隨時確探奏聞歸
綏至甯夏一帶陸運維艱著照所請督率國英轉飭薩拉齊托克
托城兩廳趕造船一百隻試行運解其各路駝隻解到並由陸路
轉運以速補運毋得稍有延誤富勒琿見在帶兵出防所有歸化
城副都統印務卽著定安暫行兼署將此由四百里各諭令知之
尋文盛奏見在賊向西竄軍臺境內並無匪蹤仍前枚靜報聞○
癸亥雲貴總督劉嶽昭奏提督馬如龍進攻新興臨陣受傷得旨
馬如龍督剿受傷實屬奮勇可嘉見在傷痕是否平復殊深廕繫
○予雲南陣亡總兵官田仲興祭葬世職○甲子諭軍機大臣等

金順奏官軍剿回獲勝悍酋伏誅見在籌辦情形一摺本月初間王家疇回逆由牛頭山竄過河西滋擾渠工經金順等督兵在黃渠口截剿獲勝陣斬逆首梅照禧復將乘夜逃出之王得等逆擒獲正法卽著金順會同張曜一面撥派重兵鎮攝一面疏通糧路護修渠工並將後套之糧設法運赴甯郡俾資屯積惟該處東北一帶回寨時圖出擾金順等務當分兵防剿庶糧運不至阻梗並飭令提督劉廷一軍暫紮石磴一帶籌辦兵食毋稍疏虞將此由五百里諭令知之○諭奎昌奏代呼圖克圖聲明繳還印信一摺喇嘛棍噶扎勒參前因塔城赴援賞給呼圖克圖名號旋給印信茲據奎昌奏該呼圖克圖呈稱印信內僅鐫名號並無帶兵字樣雖裁布倫托海而與印信無涉印信旣繳是並名號亦裁且於未結事件勢難辦理請派員詳查經辦各務等語該呼圖克圖印信

是否與帶兵無涉應否繳還刻下有無經辦未結事件著福濟奎
昌會同確查彼此妥商奏明辦理原摺著鈔給福濟閱看將此由
五百里各諭令知之○調察哈爾馬五百匹解金順軍營○乙丑
諭軍機大臣等李鴻章奏酌派勁旅分道赴陝並卽督隊前進一
摺據稱周盛傳等軍已由周口拔隊進赴潼關郭松林所部步隊
亦抵樊城該督擬帶親兵馬步先由南陽陝州大路入關駐候隊
伍到齊再行擇要進紮並派員扼守秦楚邊防兼護後路餉運各
情所籌均屬周妥見在竄陝回股雖經甘陝各軍剿敗而崔禹等
逆尙未殲除甘省金積堡圍攻正急河州狄道賊巢林立秦隴毗
連處所甚多防不勝防陝北延榆綏一帶土匪潰勇又復出沒靡
常李鴻章務當統帶援師星馳前往其郭松林一軍並著檄令趕
緊催齊剋期繼進毋稍遲延至入關後應如何擇要扼紮並將北

山土匪潰勇接剿淨盡及籌辦糧運屯墾兼營之處卽著該督與蔣志章悉心籌商次第舉辦用紓厘繫貴州遵義教案日久未結殊難折服遠人之心該督當懷遵二十五日諭旨迅飭余思樞會同黔省官員妥速訊結將此由六百里諭令知之○以故肅恪親王華豐子隆懃襲爵○廣安徽鄉試中額一名

五月丁卯諭內閣劉崐奏撲滅滋事會匪首要各犯全行伏誅一摺湖南湘鄉縣會匪逆首賴榮甫卽二蒙花本年二月間潛集匪黨分股焚掠經劉崐派出官軍會同該縣團練認真剿辦當將該逆首及逆目康學池等一併擒獲訊明正法全股悉就撲滅辦理尙爲妥速仍著劉崐飭令各該地方官督率團練實力巡緝遇有不法匪徒立即查拏懲治以靖地方○諭軍機大臣等劉崐奏援黔官軍疊克苗寨暨撲滅會匪情形各一摺湖南援黔官軍由五

岔進兵沿途雕剿平毀苗寨多處並攻克施洞口及九股河各壘
鎮遠逆苗亦經鄧善燮等督兵截擊大挫兇鋒兩路官兵見在共
規新城惟小江南岸苗寨林立必須先將北岸疏通方可併力南
向席寶田擬卽合軍先拔新城再由新城迎剿而上所籌尙妥惟
川軍前因餉乏未能會剿東坡以致黃仁遣回軍鎮遠此時川軍
若進紮數十里由重安江壓擊而下埽蕩施黃之賊則川楚兩軍
聲勢可期聯絡著崇實吳棠迅速飭該省各營剋期前進相機剿
辦並著劉崐檄飭席寶田會同川軍協力進剿務將張包等逆股
悉數殲除毋稍鬆勁至湖南湘鄉會匪竟敢聚眾謀逆經該處官
紳登時掩捕立將首夥各犯悉數擒斬全股撲滅辦理尙爲迅速
嗣後務當檄飭地方文武嚴密稽查隨時搜捕毋令伏莽潛匿又
生事端劉崐見已飭屬一體舉行團練著卽認真興辦不得有名

無實又據吳棠奏稱巴塘地震籌款撫恤各等語本年三月間四川巴塘一帶地震火發壓毀人民房屋該處遭此天災殊堪憫惻吳棠業已籌動款項派員前往賑恤卽著妥爲安撫毋令失所將此由五百里各諭令知之○諭劉崐奏緝獲會匪夥黨分別辦理等語廣東陽山縣屬茶田等處土匪勾結湖南宜章臨武等縣匪徒聚眾滋事經劉崐督飭該地方文武將匪首李求球等兜拏並搜獲逆書門牌等件已將首要各犯正法其餘脅從黨與分別監禁管束卽著劉崐飭令章濂吳錦章等務將逆犯悉數拏獲不准一名漏網瑞麟李福泰亦當檄飭林述訓等將茶田等處逃散餘黨並邀約入會之劉姓查拏懲辦以靖地方仍隨時督率各該員弁於交界處所會同巡查毋令匪蹤潛入將此各諭令知之○予貴州陣亡參將陶正柏祭葬世職○戊辰予浙江巡洋被戕副將

陳紹祭葬世職建祠○庚午命崇實赴貴州會同曾璧光查辦教
案○辛未 上詣 大高殿祈雨○壬申諭軍機大臣等蔣志章
奏籌辦北山情形擬咨商李鴻章撥兵進紮豫遏回逆紛竄一摺
陝省北山一帶地曠人稀潰勇土匪降眾流民雜處山內往往勾
引外匪乘機竊發見在甘省鼠陝回股雖經各軍擊敗悉行竄出
而秦隴接壤之區自榆綏以迄鳳漢毗連計二千餘里回匪之由
慶甯等處窺伺陝境者又無定蹤其潰勇土匪每於宜川延長延
川安定無兵之地盤踞肆掠內地各軍防守勢難徧給蔣志章所
陳必期而後能防必賑而後能壅暨咨商李鴻章酌撥勁旅擇要
進紮各情均能洞中窺要李鴻章計自襄陽起程由南陽陝州大
路入陝著卽催集各隊趕緊前進就近與蔣志章酌度情形檄飭
各軍於秦隴交界如定邊甯州等處擇要扼紮一面酌派勁旅由

韓城之靈官廟入由節節按捕使賊匪無可潛藏以清內患如有畏罪投誠者並著隨時籌辦蔣志章卽將見在所辦情形與李鴻章反復商推以期緩急合宜至墾荒積穀誠爲安插降眾飢民之善策然事貴實力舉行不可徒託空言除廣東粵海關欠解各餉本日已照請諭知瑞麟等迅卽籌解外該撫當督飭藩司先行籌款派員乘大軍將集匪勇聚殲之時分赴北山各州縣會同地方官覈實辦理用救民生至延榆綏各屬應如何慎選牧令破格獎勸隨時創懲及通省吏治應如何整頓之處該撫務當督率司道等悉心酌覈用副厚望將此由五百里各諭令知之○諭總理各國事務衙門奏英國使臣威妥瑪請於沿海水底暗設通綫謹將辯論各節據實密陳一摺洋人以貿易爲本時慮中國舟車遲滯欲以外國之銅綫諸法試行於中國上年議修英約時英國使臣

阿禮國卽以此事屢次瀆請均經總理各國事務王大臣嚴詞峻
拒見在該國使臣威妥瑪復請由廣州汕頭廈門福州甯波各海
口水底暗設銅綫通至上海並稱前議通綫之法俱係陸路明設
此次係在海底暗設其綫端一頭在船隻內安放卽在灣船埠口
海面停泊與從前所論迥殊似與中國毫無虧損等語該衙門見
將沿海水底暗設數字揭清該使聲稱安綫之處如有民人損傷
地方官無須追償修費已由該使轉飭局商遵辦著南北洋通商
大臣暨沿海各督撫飭各關道地方官嚴密稽查遇有洋人安設
銅綫之處止准在沿海洋面水底其綫端止准在船隻內安設卽
在沿海埠口向來停泊各洋船碼頭之外近海處所停泊儻有將
綫端牽引上岸不遵定章辦理者卽照會領事官立時查禁以杜
流弊而絕效尤將此由六百里諭馬新貽瑞麟英桂丁日昌丁寶

楨卞寶第李福泰崇厚並傳諭楊昌濬知之○甲戌諭軍機大臣等崇實吳棠奏援黔官軍攻克苗寨見籌會擊一招貴州黃飄白保等處苗寨經道員唐炯等督隊攻克軍聲大振提督陳希祥等復將筆架山六角基等寨踣平見擬進取螃蟹並約會楚軍合擊商同黔軍助剿卽著崇實吳棠飭令唐炯等督率兵勇乘勝進取毋稍鬆勁並著劉崐飭令席寶田由新城會剿甕谷籠巖門司等處以收夾擊之效曾璧光亦當嚴檄本省官軍由貴定之羅坪穀洞進紮灰坡牽制都勻麻哈賊勢使川楚各軍得以深入迅殲醜類不可專恃援軍致失機宜將此由五百里各諭令知之○乙亥諭軍機大臣等張廷岳等奏督兵起程剿賊暨請調兵會剿各摺片張廷岳以賊股仍在賽因諾顏部落西界盤踞已統蒙兵起程咨明察哈爾綏遠城帶兵各員一併赴圖謝岡汗部落會商進剿

並分派官兵防堵惟聞賽因諾顏部落迤西刻下已無賊匪庫倫附近亦無匪蹤此時正不宜紛紛徵調轉涉張皇所請飭綏遠城察哈爾派兵會剿之處著毋庸議張廷岳見擬前赴額爾德呢招等處閱看蒙兵即著心眞整頓毋涉騷擾一俟查閱完竣即當折回庫倫該處地方緊要不得日久在外致有疏虞蒙古各游牧道路遼闊定安福濟榮全文盛張廷岳阿爾塔什達仍當隨時偵探如再有匪徒竄擾卽行就近兜拏毋任紛竄察哈爾應撥庫倫餉銀五萬兩卽由張廷岳等派員迎提摺節撥用將此由五百里各諭令知之○丙子諭軍機大臣等金順奏剿辦南路竄踞各匪疊勝一摺甯朔中衛交界木高山一帶陝土各回滋擾經金順商同張曜督隊進剿遇賊於廟山湖各軍合戰張曜復令總兵王連三等力扼西面該逆向南奔逃官軍斬獲甚多其由峽口覓渡各匪

亦經追殺淨盡馬家灘賊眾竟敢在分守嶺地方列隊抗拒金順等又令常福各軍分路衝擊賊敗入巢各軍乘勝追擊殲斃回匪二百餘名奪獲器械無數勦辦尙屬得手刻下南路計可稍安而北路渠口通昌通貴馬全各回堡緊濱河岸仍著金順會同張曜督率各軍痛加勦洗毋任陝回從中糾合復肆蔓延至庫倫並察哈爾軍臺等處前有賊匪滋擾見賊蹤雖已遠颺而邊外地方遼闊難保該逆不乘虛復來金順務須審度情形分投截勦以遏逆匪北竄之路不可稍涉大意將此由五百里諭令知之○戊寅諭內閣委散秩大臣公承志著更名承需○左宗棠奏續據劉錦棠黃萬友稟十二日馬化澂復遞稟到營乞撫求大兵退吳忠堡劉錦棠仍飭之十四日三鼓訶金積附近各寨人聲沸騰陝甘逆黨數十成羣零星散布乘夜修壕自金積迤西而北繞東南達波浪

湖分段濬築意在引馬連渠之水入壕匯流於湖以阻官軍進攻西南之路劉錦棠等令各營伺賊蹤稍近用槍礮測準轟之十五日天甫曙賊悉遁歸巢連夜加濬如故十八日劉錦棠傳令各營挑壯士攜鋤鍤分道平賊壕然偪近賊寨槍礮對轟子如雨注軍士冒險平毀賊復伺閒加修二十一日黎明劉錦棠整隊擊賊金積各寨角聲四起賊傾巢出或排列壕邊或伏壕內提督蕭章開喻執益曹義勝爲前驅各路馬步繼之行未里許步賊憑壕拒敵馬賊分鈔東南副都統雙壽副都統銜協領花夏阿提督余虎恩躍馬陷陣併力將馬賊擊敗蕭章開乘機越長壕缺口擊步賊軍士從之槍矛並舉悍賊紛紛倒地餘眾勢漸不支而西路之賊尙搶過濠外鈔蕭章開之後黃萬友率提督陶定昇周國勝橫截之提督何作霖王承贊李占椿揮隊齊進步賊大潰適雙壽余虎恩

等率驍騎自東南躡賊而來官軍馬步合力兜剿擒斬極多餘賊向金積東門逸去是夜四鼓賊復潛出掘壕劉錦棠調開花田雞礮輪轟之適炸彈中羣賊傷斃多名而退二十三日天明賊出金積堡東門各寨旗幟如林沿壕列隊翼蔽修壕之賊馬賊數千鈔過東面劉錦棠傳步隊各營分中左右三路迎剿令馬隊應馬賊部署既定陶定昇督周國勝軍功張俊猛撲中路步賊死拒馬賊一併回頭雙壽花夏阿余虎恩馬隊一氣壓下劉錦棠飛催何作霖蕭章開左右兩路剗壕而進各路悉銳衝殺賊屍枕藉餘向各寨狂奔官軍躡追至寨根而還自十四夜至二十三日共斃陝回甘回一千四百五十名生擒一百三十四名逆目馬二虎陳金子訊明一併正法弁勇陣亡四十二名受傷一百九十八名賊連日被創之後晝則踰伏不出夜仍潛起修壕分股沿秦壩關上下增築

渠隄復圖洩水以困官軍劉錦棠黃萬友相度地勢令各營多掘溝道防之四月初一二等日秦渠馬連渠之水被賊決放勢如潮湧平地成川各營正併力疏濬忽西北風緊水漲數尺激湍衝齧蔡家橋一帶傍壘長隄洪流洶湧勢殊險惡駐蔡家橋之李占椿各營隨機搶堵或密排木椿或盛以布袋用茅苞實土其中悉力捍禦初三日風止溝道成引水下王家湖波浪湖注永甯洞合流入黃賊計仍不得逞馬化澂見官軍堵洩得宜水不能困復噉零股馬步出金積堡西北馬家灘偷渡黃河西竄大壩分水嶺三關地方劫官軍廣武中衛山後糧運初八日黃萬友督隊由葉昇堡渡河分支赴三關搜剿自率李占椿喻執益駐大壩初九日西行五里擒獲賊諜訊知有賊自山後劫牲畜回金積堡相距數里黃萬友設伏三路待之少頃賊馬步三百餘絡繹而至黃萬友揮隊

突擊賊狂號亂奔官軍分途躡殺十餘里殄滅淨盡生擒四十二名弁勇僅受傷七人而已十三日陶定昇張俊余虎恩隊伍由山後護糧東行近三關五六里偵馬步賊四五百名迤南而北官軍伏大隊於後挑十數騎迎戰以示弱賊爭出搶糧與余虎恩相持陶定昇張俊等躍馬衝出砍斃二百餘名生擒二十一一名餘逆四散官軍護糧而還據生擒賊供初九日大壩竄賊係馬正和餘黨十三日三關竄賊係陝回閻明一股逆目馬順之越山不及登時伏誅臣維金積堡逆賊恃其巢堅糧足抗拒官軍近經疊次痛創知其巢堅不足恃雖積糧素多然以之供給陝回及河州臨洮西甯援賊耗去不少據各路探報陝回及臨洮西甯各回零星竄走馬化澂雖一面抗拒一面哀祈就撫而潛謀徙巢他遁苟延目前所苦駝畜餓斃已多不敷裝運欲勾引各路黨夥前來援救相距

遠者千餘里近者數百里就食既無以供裹糧又難爲繼似其情勢難以久支見在中路南路官軍均獲勝仗制賊更有餘力臣惟有堅持成算慎以圖之又奏金運昌前因東道阻梗復派提督王鳳鳴督帶馬步回顧花馬池定邊安邊往來梭巡以清後路運道三月初七夜回逆百餘竄至花馬池北二十里圍攻民寨王鳳鳴督守備何全忠馬步馳援分數路掩擊殲賊殆盡生擒三十餘名據供賊目馬三保零股百餘盤踞郝家溝王鳳鳴令爲嚮導引官軍前往初九日行四十里抵郝家溝馬三保出掠未歸掩殺守巢之賊三十餘名兩戰共斃賊一百二十餘名初十日分駐定邊之總兵馮殿英調馬步賊數百攻東南民寨整隊疾起襲之斬賊六十七名十四日馮殿英何全忠襲賊於輓井鎮躡賊至蔡家窩破其巢殺賊七八十名逆首馬繼元噉黨拚闖何全忠怒馬直前揮

刀斬之各隊繼進斬其餘眾七十餘名生擒二十餘名自是花定一帶游氛少斂二十二日王鳳鳴令遊擊馬心勝率隊赴安邊護糧隨身馬步不上百名遇回逆二百餘騎於甌井堡外王鳳鳴揮隊猛戰賊披靡莫當官軍躡十里至張家圈擒賊目張福保賊黨拚救何全忠奮威衝突殺入賊陣頭中木棍傷墜馬王鳳鳴向前策應連受矛傷裹創力戰軍士悉銳陷陣何全忠復躍馬助之斃賊百數十名餘逆狂奔四散據獲賊供馬化澂喉張福保帶馬步賊二百餘劫糧於東路者是日之戰已損折三分之二金運昌扼駐金積前敵營壘二十二日調賊踞下橋東南四五里許武化澂寨分立小壘二座正在興工比派總兵張懷玉副將王化成潛師夜起襲其不意伏副將高得勝遊擊侯得明之兵於賊壘附近道左防武化澂馬八條援賊是夜四鼓王化成張懷玉進攻賊壘正

得手間武化澼寨出百餘賊救護高得勝突擊之賊仍膽縮入寨
官軍平其壘收隊回防馬八條寨出賊數百邀截歸路復爲侯得
明隊伍所敗其竄近河岸零騎百餘提督宋朝如整隊衝擊擒斬
亦多是役共斃賊近二百名 上諭軍機大臣等金積堡踞匪經
劉錦棠督隊進攻該逆出巢抗拒我軍分路攻擊立將賊壕平毀
其西竄大壩分水嶺三關劫糧之賊又經我軍擊退卽著左宗棠
飭令劉錦棠聯絡金順張曜派出各軍乘賊勢窮蹙之時分投截
剿毋令他竄花定等處賊匪經金運昌派提督王鳳鳴擊剿獲勝
復親督隊伍將金積堡附近賊壘攻破並著飭令金運昌乘此聲
威迅速進剿毋稍鬆勁金積一賊堡耳卽云巢堅糧足何以頓兵
如許之久屢攻未下本日據奏中路南路均獲勝仗未知賊勢若
何殊深廬繫李鴻章指日抵陝秦隴交界處所已諭扼要分紮該

大臣惟當振刷精神嚴檄劉錦棠等乘勝進攻一面飭南路各軍掃蕩而西進規河狄使賊彼此不能相顧迅奏膚功毋得日久遷延老師糜餉至該大臣各營後路既有淮軍進紮左宗棠尤當與李鴻章和衷共濟各泯畛域之見俾兩省聯爲一氣庶防勦合籌更資得力將此由六百里諭令知之○予甘肅陣亡參將張兆孟等祭葬世職○已卯諭軍機大臣等劉峴奏援黔各軍攻拔新城見約川軍會剿一摺席寶田一軍自攻克施洞口等處逆巢後先將涼傘坨攻破乘勢直薄新城賊眾奔潰立將新城克復各路援賊疊被官軍擊敗並焚毀甕板等處賊壘蕭榮芳亦督軍疊破苗寨多處勦辦尙爲得手席寶田見已約川軍會師巖門合力夾擊卽著崇實吳棠飭令道員唐炯迅督所部由濫橋前進與席寶田各軍聲勢聯絡並著劉峴檄令席寶田剋期會同進剿掃蕩清江

北岸以次規取台拱毋稍鬆勁前據劉岷奏川軍須由重安江下
學肅清施黃又據崇實等奏攻克黃飄白保已約楚軍會擊甕公
龍巖門司等處見在新城既克川楚兩軍聲氣漸通正當乘此聲
威通力合作不得彼此觀望遷延致失機會曾璧光亦當就黔省
兵力會合川楚各軍迅速剿辦盡殄苗氛將此由五百里各諭令
知之○予貴州陣亡副將蔣子榮等祭葬世職○辛巳 上詣

大高殿祈雨○諭軍機大臣等李宗義奏毅軍在蒙境剿賊獲勝
一摺回目于得沅帶領賊眾由金積堡竄出在察漢淖爾盤踞提
督蔣東才督軍進剿行抵胡魯蘇廟生擒賊匪多名旋至窩爾兔
溝該逆列隊拒戰遊擊黃義之等首先衝擊賊馬四路圍裹蔣東
才將賊擊敗沿途擒斬甚多該逆復來襲營官軍乘勝掩殺山坳
伏賊與前股敗逆出拒經礮隊將其賊首轟斃賊眾潰逃又經各

北岸以次規取台拱毋稍鬆勁前據劉峴奏川軍須由重安江下
擊肅清施黃又據崇實等奏攻克黃飄白保已約楚軍會擊甕谷
龍巖門司等處見在新城既克川楚兩軍聲氣漸通正當乘此聲
威通力合作不得彼此觀望遷延致失機會曾璧光亦當就黔省
兵力會合川楚各軍迅速剿辦盡殄苗氛將此由五百里各諭令
知之○予貴州陣亡副將蔣子榮等祭葬世職○辛巳 上詣

大高殿祈雨○諭軍機大臣等李宗義奏毅軍在蒙境剿賊獲勝
一摺回目于得沅帶領賊眾由金積堡竄出在察漢淖爾盤踞提
督蔣東才督軍進剿行抵胡魯蘇廟生擒賊匪多名旋至高爾兔
溝該逆列隊拒戰遊擊黃義之等首先衝擊賊馬四路圍裹蔣東
才將賊擊敗沿途擒斬甚多該逆復來襲營官軍乘勝掩殺山坳
伏賊與前股敗逆出拒經礮隊將其賊首轟斃賊眾潰逃又經各

營追殺步賊盡被殲除所餘馬賊向西南狂奔受傷亦已過半見在五勝旗內據報已無賊蹤蔣東才撤回神木惟逆首于得沅尙無實在下落此股賊匪既屬兇悍異常難保不勾合各路回匪復圖竄擾仍著李宗義迅咨宋慶檄飭蔣東才等勤加偵探並於沿邊處所豫籌防範如有匪蹤竄近卽相機截剿毋稍疏虞前據定安奏烏紳旗境尙有回匪滋擾該將軍務飭扎那噶爾第等偵明賊蹤分投堵擊一面咨令宋慶與各軍聯絡聲勢妥籌布置以遏寇氛將此由五百里各諭令知之○詔清理庶獄○飭直隸等省迅解黑龍江欠餉○壬午以旱諭各省督撫勤修民事力除積習○諭曾國藩等嚴緝馬賊○裁安徽蒙城縣訓導改設渦陽以亳州義門巡檢隸渦陽移亳州同於丁固寺集爲分防州同○甲申予廣東陣亡參將朱國雄祭葬世職○乙酉諭軍機大臣等英

桂奏拏獲句煽構釁之要犯遵旨正法一摺已革副將蕭瑞芳卽蘇阿成先在廣東原籍煽惑洋人構禍繼在臺灣偷見洋弁釀成巨案實屬罪大惡極經黎兆棠將革員拏獲遵旨卽行正法辦理深合機宜其未獲之許建勳仍著英桂密飭黎兆棠不動聲色務將該犯迅速拏獲立正典刑毋令潛逃出洋句煽滋事○丁亥命再展五城飯廠及普濟堂功德林賑限兩月並嚴禁胥吏侵漁○己丑諭軍機大臣等成祿奏東路勦辦得手回股西竄請飭左宗棠分兵夾擊並請轉飭甘涼各廳縣按月攤派軍糧及籌款採買糧石復自陳病情各摺片據稱甘涼一帶尙係完善之區爲省糧所自出見在東路大兵勦辦得手回股逐漸西趨若由南北兩路竄擾口外安敦玉防兵極單西路甚屬可慮請飭左宗棠先撥二三十營派員統領西上將河西南北兩路要隘分布堵扼其撫彝

高臺應運省城倉斗糧四千石業經全數截留而士卒三千餘眾日食浩繁請飭左宗棠檄飭甘涼各廳縣按月攤派供支抑或籌撥餉項轉飭採買糧石以濟軍食西路情形緊急該提督傷病舉發並請飭迅速分兵以資夾擊等語成祿所部見計僅有八營南北山口太多勢將顧此失彼東路得手以後零星回股已有偷竄河北者該軍月餉又因道路梗塞各省撥解無期士卒日形苦累所奏亦係實情左宗棠駐軍甘境西路自應兼顧刻下回股逐漸渡河該大臣務當揆度情形撥軍西上與成祿一軍聯絡聲勢將南北兩路要隘嚴密設防並相機分兵夾擊以保甘涼門戶其甘涼各廳縣能否攤派該軍口糧及籌款購糧俾資接濟之處並著隨時斟酌辦理至成祿應否撤回或酌留該大臣軍營及所部勇丁應撤應留仍著懷遵疊次諭旨覈議具奏將此由五百里諭令

知之○庚寅諭軍機大臣等崇厚奏津郡民人與天主教起釁見
在設法彈壓請派大員來津查辦一摺據稱天津地方有匪徒迷
拐人口牽涉法國教堂情事經崇厚與法領事豐大業等約定於
五月二十三日令天津道府縣帶同匪犯武蘭珍親往天主堂面
見教士謝福音並帶該犯指勘所厯地方房屋與該犯原供不符
亦卽帶犯而回旋據教士謝福音至崇厚處商量以後查辦之法
商妥去後是日未刻忽聞有教堂之人與觀看之人口角爭毆正
在派武弁前往彈壓法領事豐大業忽來署中神氣兇悍帶有洋
槍二桿後跟一外國人手執利刃出言不遜將洋槍向崇厚施放
幸未被中該領事將桌上物件信手欣損咆哮不止崇厚以其時
民情洶洶恐激成事變勸令該領事不可出去豐大業竟飛奔出
署天津縣知縣在彼彈壓當面勸阻該領事卽對其放槍將該縣

知縣家人打傷百姓激於眾忿將該領事羣毆致死並焚毀教堂等處房屋見在民情稍戢等語仍著崇厚督同地方文武將該民人等設法開導妥爲彈壓毋令聚眾再滋事端曾國藩病尚未痊本日已再行賞假一月惟此案關係緊要曾國藩精神如可支持著前赴天津與崇厚悉心會商妥籌辦理匪徒迷拐人口挖眼剖心實屬罪無可逭既據供稱牽連教堂之人如查有實據自應與洋人指證明確將匪犯按律懲辦以除地方之害至百姓聚眾將該領事毆死並焚毀教堂拆毀仁慈堂等處此風亦不可長著將爲首滋事之人查拏懲辦俾昭公允地方官如有辦理未協之處亦應一併查明毋稍回護曾國藩等務當體察情形迅速持平辦理以順輿情而維大局原摺鈔給曾國藩閱看將此由五百里密諭知之○諭左宗棠穆圖善奏各營勦賊獲勝情形一摺甘肅永

昌縣境突有竄匪肆擾經總兵王仁和派隊往剿賊始敗遁其竄擾中衛地方賊股亦經總兵黃金山疊次擊敗擒斬甚多副都統善山保等復在金縣平番境內剿賊獲勝此次附省各營遇賊卽擊尙屬奮勇惟賊股未盡殄滅難保不去而復來仍著穆圖善分飭各營隨時加意偵探認真堵擊毋稍疏懈永昌中衛金縣平番等處既有匪徒四出滋擾省城根本重地尤須加意防維穆圖善當就見有兵力分投防剿毋任賊勢蔓延左宗棠雖尙駐平涼亦當妥籌兼顧不得稍存膜視本日據奏部撥西甯專款每月銀二萬數千兩請飭西征糧臺墊解足數等語豫師見在募勇五營需餉甚殷部撥各省月協西甯專款共銀二萬數千兩本歸西征糧臺轉解著左宗棠行知袁保恆按月照數轉解西甯如各省協款未能按期如數解到卽著袁保恆先行設法籌解足數以應急需

毋許推諉將此由五百里各諭令知之○諭豫師奏籌募平番等處勇丁並接左宗棠咨招募巴扎等處團民酌辦情形各摺片西甯竄賊麇聚且有窺伺碾伯之意陝河各逆有圖攻威遠堡爲馬化澁徙巢之計亟應迅籌援勦豫師見擬俟撥款到日卽派遊擊張鴻發等前往平番一帶募練成軍著卽飭令該員等認真選擇總須一兵得一兵之用不得濫行開募徒糜餉項碾伯等處團堡向尙得力並著督飭該處文武竭力整頓藉資保衛左宗棠擬募巴扎等處團勇助勦豫師以該處竄匪充斥各圖正在堵禦礙難招募著卽酌度情形咨商左宗棠妥籌辦理此時豫師所募新勇尙未成軍左宗棠又無可撥之兵著豫師飛飭穆圖善所撥唐有彥三營馳赴防所力籌保護仍一面趕募新軍協同堵勦毋稍疏虞西甯地方彫敝別無可籌之款所有指撥西甯月餉著戶部行

知各該督撫務須照數源源籌解不得稍有延欠將此由五百里諭令知之○辛卯 上詣 大高殿祈雨○壬辰諭內閣崇厚奏津郡民教起釁爭毆自請治罪並將地方官分別嚴議革職一摺此案天津民人因迷拐幼孩匪徒有牽涉教堂情事懷疑起釁復因法國領事豐大業在崇厚署中施放洋槍並向天津縣知縣放槍忿激羣毆致將豐大業斃命並焚毀教堂崇厚辦理通商事務不能綏靖地方天津道周家勳有表率之責未能先事豫防天津府知府張光藻天津縣知縣劉傑辦理不善以致釀成巨案均屬咎無可辭崇厚周家勳劉傑張光藻著先行交部分別議處仍著曾國藩於抵津後確切查明嚴參具奏至迷拐人口匪徒及爲首滋事人犯均應查拏懲辦並著曾國藩會同崇厚徹底根究秉公辦理毋稍徇徇○諭軍機大臣等昨因崇厚奏津郡民教構釁情

形當諭曾國藩前赴天津與崇厚悉心妥籌持平辦理本日復據崇厚奏自請治罪並將天津道府縣各官請分別嚴議革職及查津郡見在情形各摺片已明降諭旨將崇厚等先行交部分別議處並令曾國藩於抵津後確查奏參矣匪徒迷拐人口本干例禁挖眼剖心之事尤屬罪無可追人所共憤全賴地方官平日嚴密稽查隨時拏辦如任民間擅自拏人實屬不成事體著曾國藩於抵天津後與崇厚體察情形妥爲辦理嗣後遇有此等案件惟當責成地方官嚴密拏辦並飭該府縣剴切曉諭不准民間擅自拏人徒滋紛擾至百姓毆死領事焚毀教堂各情尤宜迅速查明一面檄飭地方官嚴緝正兇彈壓滋事人眾毋任再起釁端以安中外人民之心原片著鈔給曾國藩閱看將此由五百里各諭令知之○癸巳雨○諭軍機大臣等文麟景廉奏妥逆遣賊赴肅沿途

搶劫疊經弁勇民勇擊敗並鈔錄僞文呈覽一摺烏魯木齊逆首
妥得璘遣馬賊由南湖沿邊潛赴肅州沿途劫搶統領魏忠義率
領弁勇由石槽折回小西梁追至大圪塔迤東奪回搶去商駝等
物該逆復由北山竄至玉門縣之黃花營肆行搶掠亦經該處民
勇戶民擊敗仍著文麟景廉督飭兵勇勤加訓練隨時嚴爲防範
一面激勵各處民勇協同守禦毋任該逆乘虛肆擾以靖地方安
西玉門等處臺站時有搶奪公文案件亦屬不成事體並著該大
臣等咨會安肅道飭屬隨時查究毋稍遺失至肅州甘州西甯薩
拉固原河州花寺泰子寺岷伯米拉溝等處回眾紛繁妥得璘索
煥章時以僞札句令出關難保不乘機蠢動卽著左宗棠穆圖善
分飭各路帶兵將弁時加偵探如遇有匪蹤竄至卽行勦捕淨盡
以斷賊援開外地方遼闊回逆詭譎異常文麟等當懷遵疊次諭

旨力籌保衛不可稍涉大意肅州收復未久人情易滋浮惑成祿亦當檄飭該處防守文武加意巡防毋令妄得璘等從中勾結別生事端蘇海麟等自求辦撫本不足恃見據僞文內有札付蘇海麟等語可見逆酋並無向順之心該提督仍當與文麟等妥籌防勦毋爲該逆所紿將此由五百里各諭令知之○甲午諭軍機大臣等金順奏甯夏同情並籌辦勦撫機宜繪圖呈覽一摺據稱回匪乞撫應予限呈繳馬械一律平毀寨壘仍以兵力鎮壓惟官軍缺糧須運道疏通再圖進勦等語見在軍務既不難於勦賊而難於籌糧卽著金順會同張曜趁此石磴一帶並無賊蹤將軍食軍械源源運解毋令稍有缺乏一面聯絡河東各軍迅籌進勦之策將兇悍回匪悉數殲除仍當加意防範毋以該逆暫時乞撫爲可特稍涉疏懈致爲所乘圖畱覽將此由五百里諭令知之○以劉

有銘爲左副都御史

由大理寺卿遷

○乙未諭內閣前因天津地方有匪

徒迷拐幼孩牽涉教堂民間懷疑起釁將法國領事官羣毆斃命
焚毀教堂並毆斃多人兼誤殺俄國商民情形甚屬可憫業經降
旨將崇厚及辦理不善之地方官先行交部議處仍令曾國藩確
查具奏並將迷拐人口匪徒及爲首滋事人犯嚴拏懲辦因思各
國通商以來遇有交涉事件皆有條約可循中外商民相安已久
朝廷一視同仁但分良莠不分民教各處匪徒如有影射教民作
奸犯科者卽應隨時訪拏詳細究明從嚴懲辦豈可任令民間傳
播謠言妄行生事此次天津既有民教滋鬧之事恐各省地方亦
不免因此懷疑起釁著各直省督撫嚴飭所屬地方官務須剴切
曉諭妥爲彈壓並將各處通商傳教地方隨時保護毋任愚民藉
端滋事○諭軍機大臣等李鴻章奏行抵潼關派兵相機堵剿並

請調郭寶昌赴陝各摺片李鴻章見已督帶各營先後入關擬令周盛傳一軍進顧北山郭松林一軍專顧腹地布置甚妥卽令分飭各營會同陝楚各軍隨時認真堵剿迅將本境匪類悉數殲除毋令外匪乘隙竄回再圖勾結滋擾以期綏靖地方陝省產糧較少轉運維艱該督已派遣員郭道直前赴晉省沿河一帶提取各州縣辦存軍糧由宜川等屬近水處所分路轉運並因郭松林進紮西北爲之謀及糧運辦理均合機宜卽著該督悉心籌畫以裕軍食一面進駐西安隨時相度機宜會商蔣志章次第妥辦晉防已鬆郭寶昌在晉僅帶一營此時自不妨抽動李鴻章以該提督熟悉北山情形檄令來陝會同周盛傳等剿辦北山土匪潰勇著李宗義卽飭郭寶昌迅帶該營西渡聽候李鴻章調遣郭寶昌原防地段著李宗義卽於防河各營內酌量勻撥填紮免致貽誤將

此由五百里各諭令知之○命三口通商大臣兵部左侍郎崇厚爲出使法國欽差大臣以大理寺卿成林署三口通商大臣○是月豁免直隸安州等三州縣積澇地畝上年額賦並緩徵積年糧租暨民借倉穀蠲緩福建雲霄等十一廳縣暨羅溪等縣丞所屬被旱上年額賦緩徵山東德州等十六州縣暨濟甯等三衛被旱本月上忙額賦雜課